





c. 147





DECLARATION  
DV ROY, SVR LES  
Edicts de Pacification.

474 Donnée à Paris le 22. May 1610. &  
verifiée audit an, le 3. Iuin.



A PARIS,

Par ANTOINE ESTIENE, Premier  
Imprimeur & Libraire ordinaire du Roy,  
ruë S. Iacques au College Royal,  
deuant S. Benoist.

---

M. DC. XLIV.

*Avec Prinilege de sa Majesté.*

Case

F

39

326

1644 fce

THE NEWBERRY  
LIBRARY





DECLARATION DV ROY,  
sur les Edicts de Pacification.



OVIS PAR LA GRACE DE  
DIEV ROY DE FRANCE  
ET DE NAVARRE, A tous  
ceux quices presêtes Lettres ver-  
ront, Salut. Depuis le mal-heu-  
reux & detestable assassinat de nô-  
tre tres-honoré Seigneur & Pere le Roy dernier  
decedé (que Dieu absolue) la Royne Regente  
nostre tres-honorée Dame & Mere, ayant tou-  
jours les larmes aux yeux, & la tristesse au cœur,  
n'a toutefois laissé de trauailler incessamment, &  
auec tres-grande magnanimité & prudence, pour  
empescher que cét accident si funeste, ne fust  
d'aucun preiudice à nostre Personne & dignité,  
ny à ce Royaume, & à nos subjets, se tenant obli-  
gée à ce deuoir, non seulement pour l'affection  
naturelle qu'elle nous porte, mais aussi pour  
auoir esté déclarée Regente; & en cette qualité  
chargée du soin & administration des affaires du  
Royaume, par les vœux & suffrages des Princes  
de nostre sang, autres Princes, Prelats, Pairs,  
principaux Officiers de la Couronne, & gens de  
nostre Parlement assemblez tous en iceluy  
(Nous y renant nostre liêt de Iustice;) En-  
quoy son trauail a esté si heureux, & l'affection

de tous nos subjets qui estoient lors près de nous, mesmes des habitans de nostre bonne ville de Paris ; si grande & sincere enuers nous, que n'auons rien à desirer en leur obeissance & fidelité, non-plus qu'en la bonne & sage conduite de la Royne Regente, nostredite tres-honorée Dame & Mere. Ayans aussi esté aduertis par les aduis qui nous viennent chacun iour, qu'en tous les autres lieux & endroicts de nostredit Royaume, tous nos subjets, tant Catholiques que de la Religion pretendue reformée, de toutes qualitez, essayent par vne emulation loüable, de se surmonter l'un l'autre en promptitude d'obeissance, en actions & deportemens qui peuvent rendre quelque tesmoignage de leur fidelité & deuoir, dont nous auons tres-grande occasion de louer Dieu, & d'esperer, comme il luy a pleu du passé garantir ce Royaume de tres-grands perils, pour le faire fleurir par tant de siècles, qu'il veut encor par sa bonté prendre en protection nos jeunes ans, & nous donner loisir de croistre en pieté & vertu, pour employer quelque iour à son honneur & à sa gloire, la grandeur à laquelle il nous a esleué : Ce que nous le prions de bon cœur vouloir faire, & nous inspirer tousiours les Conseils qui sont requis & necessaires pour bien regir nos subjets en sa crainte, & les faire viure en paix, vnion & amitié, les vns avec les autres, comme estant le vray fondement duquel (apres Dieu) doit dependre la seureté & conseruation du Royaume. L'experience ayant appris aux predecesseurs Roys, que la fureur & violence des armes



5

n'auoit pas seulement esté inutile pour faire retourner à l'Eglise Catholique, Apostolique & Romaine, leurs subjets qui s'en estoient separez, mais plûtoſt dommageable ; qui fut cause qu'ils eurent recours par vn conseil plus heureux, à la douceur, en leur accordant l'exercice de ladite Religion pretenduë reformée, dont ils faisoient profession : A l'imitation desquels, le defunct Roy, nostredit tres-honoré Seigneur & Pere, auroit fait l'Edict de Nantes, pour reconcilier tous ses subjets ensemble. L'observation duquel Edict, avec les Reglemens faits en consequence d'iceluy, ont mis vn repos asseuré entre eux, qui a tousiours duré depuis sans aucune interruption. Au moyen dequoy, encor que cét Edict soit perpetuel & irreuocable, & par ce moyen n'ait besoin d'estre confirmé par nouuelle Declaration: Néantmoins, afin que nosdits subjets soient asseurez de nostre bien-veillance, & que nostre intention & volonté est de faire garder inuiolablement iceluy Edict, fait pour le bien & repos de tous nosdits subjets tant Catholiques que de ladite Religion pretenduë reformée :

Sçauoir faisons, qu'ayant cét affaire esté mis en deliberation en nostre présence par la Royne Regente, nostre tres-honorée Dame & Mere, Nous auons par l'aduis d'icelle, des Princes de nostre sang, autres Princes, Ducs, Pairs, Officiers de nostre Couronne, & plusieurs personnes notables de nostre Conseil, Dit & ordonné, disons & ordonnons, Voulons & nous plaist, Que ledit Edict de Nantes en tous ses poincts & arti-

cles , ensemble les autres articles à eux accordez , & les Reglemēs faits & Arrests donnez sur l'interpretation ou execution de l'Edict , & en consequence d'iceluy ; soient entretenus & gardez inuiolablement , & les contreuenans punis avec seuerité , comme perturbateurs du repos public. Enioignons à cēt effet à tous nos Officiers d'y tenir soigneusement la main , à peine d'en estre responsables , & de faire punir leur negligence avec la mesme rigueur que la des-obeissance de ceux qui y contreuendront.

Si donnons en mandement à nos amez & feaux les gens tenans nostre Cour de Parlement à Paris , que ces presentes ils ayent à faire lire , publier & enregistrer , & le contenu d'icelles garder , entretenir & obseruer de poinct en poinct selon leur forme & teneur , sans souffrir ny permettre y estre contreuenue en aucune maniere que ce soit : C A R tel est nostre plaisir. En tesmoin dequoy nous auons fait mettre nostre seal à cesp dites presentes. Donné à Paris le vingt-deuxième iour de May , l'an de grace mil six cens dix , & de nostre regne le premier.

Signé,

L O V I S.

Et sur le reply est escrit ,

Par le Roy , la Royne Regente, sa Mere,  
presente.

D E L O M E N I E.

Et seellée du grand seel dudit Seigneur, de cire  
jaune, sur double queue.

Et encores sur ledit reply est escrit à costé,

*Letres, publiées & registrées, ouy & ce consentant &  
requerant le Procureur General du Roy; Et ordonné  
que copies collationnées seroient enuoyées ausdits Baillia-  
ges & Seneschaussées, pour y estre pareillement letres,  
publiées & registrées à la diligence des Substituts du  
Procureur General du Roy, ausquels enioint certifier  
la Cour auoir ce fait au mois. A Paris en Parle-  
ment le troisieme Iuin mil six cens dix.*

Signé,

DV TILLET.

